

Wie nun das zu wegen zu bringen / ob ich wol darvor halte / daß du ein solches selbst ohn fernere meine erinnerung verstehen soltest / so kan ich gleichwol (weil ich etwan in dieser meiner meynung bey einem oder anderm irrig gehalten werden möchte) nicht vnterlassen / zum vberfluß dir dasselbige auch hiermit zu entdecken.

Demnach wann du auff eine Lini einen Puncten gegen einem andern zuvor gestochenen namhafften Puncten vber / berührter massen stechen soltest / so thue nicht mehr / sondern leg einen außgeschnitzen Winckelhacken mit der einen seiten gerad an solche Lini / jedoch also vnd dergestalt / daß die ander seite den zuvor gestochenen namhafften Puncten zugleich ganz scharpff vberschneide oder berühre / wann das also fleissig beschehen / wo dann die spiz des Winckelhackens an der Lini / von welcher du die Winckellini ziehen wilt / befunden wirdt / daselbsten hin / in oder auff die Lini ein Puncten gestochen / derselb ist vnzweiffelich eben der Punct / welchen du hast stechen sollen / das ist / der Punct so gegen dem zuvor gestochenen namhafften Puncten ganz Winckelrecht vber stehet / oder aber / auß welchem von solcher Lini eine Winckellini gezogen / gerad in den zuvor gestochenen namhafften Puncten lauffen muß / inmassen dann auch in meinem ersten Fundament solche vnd dergleichen Puncten / als nemlich der Punct m in die Lini a z, gegen dem Puncten k, der Punct e in die Lini E F, gegen dem Puncten d vber gestochen worden / vnd hab ich daselbsten jederzeit in den Wercken die Winckellinien gedippelt auffgerissen / wie sie dir dann auch auff dißmaln jederzeit auff gleiche Manier sollen fürgebildet werden.

E iij

Das